

# INUIT ATAQATIGIIT

## Inatsisartuni



26. juli 2019

UKA2019/133

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Najukkani nunalerinikkut tunisassianik tuniniaanerup annertusarneqarnissaanut atugassarititaasut pitsaanerpaajunissaat qulakkeerniarlugu Naalakkersuisut iliuusissatut pilersarusiornissamik peqquneqarnissaannik Inatsisartut aalajangiiffigisassaattut siunnersuut. Siunissami sulinissamut piffissalersuummik iliuusissatut pilersaarut imaqassaaq Inatsisartunullu kingusinnerpaamik UKA 2020-mi agguanneqassalluni.**

(Inatsisartunut Ilaasortaq Stine Egede, Inuit Ataqatigiit)

### **Tungavilersuut:**

Nunatta Kujataata silaannaa naatitsivigissallugu nunatsinni pitsaanerpaatut oqaatigineqarsinnaavoq.

Ukiup ninneranit sivisunngitsoq qaangiukkaangat seqineq qullarluariivittarpoq. Naatitanillu illup iluani piareersarnissamut periarfissaq siusissukkut pinnaasarpog. Ukiakkullu kingusissukkut aatsaat nuna qerinnarsisarpog. Taamaattumik naatitsivinni, silamilu naatitanik pilersuisinnaaneq pimoorussamik suliarineqaruni nunatta avataanit tikisittakkatsinnik annertuumik ikilisitsissagaluarpoq.

Ukiorpassuarni siuaasatta nunatta kujasinnerusortaani uumasuuteqarfimmiut naatitsinermik ingerlataqarluarsimanertik takutittareerpaat, upperaaralu namminerlu pilersorsinnaasimanagerat uaguttaaq annertunerujussuarmik atorluaanikkut iluaqutigisinnaagipput.

Ukiorpanngortuni ilisimareerparput nunatsinni inuussutissarsiorneq minnerunngitsumillu kujataani inuussutissarsiorneq siuariartortinneqassappat naatitsineq periarfissaasoq. Maannali oqaluuseriinnarnagu iliuuserisinnaasagut aallartittariaqarigut isumaqarpunga.

Nunatsinni narsateqarnermik, immikkut isiginiarlugu grøntsaginik naasunillu akuutissanik naatitsinermik, inuussutissarsiuuteqarneq siuariartortissagutsigu

inatsisitigut sinaakkutinik minnerunngitsumillu politikikkut pingaarnersiuneq ersarissoq pisariaqarpoq. Qinikkatut narsaateqarnermik inuussutissarsiortortatta illunik naatitsiviit aammalu narsaatit atorlugit grøntsaginik naatitsisinnaanerisa pitsaanerpaamik piorsarnissai anguniarlugu inuussutissarsiormut attuumassutillit inatsisit sinaakkutit eqqummaariffiginissaat pisariaqarpoq.

Apeqqut tassaasoraara qanoq iliorluni, illut naatitsiviit atorlugit, narsaatini imaluunniit taakku marluk ataqatigiissillugit naatitsinikkut tunisassiorusuttut amerlisarisinaavagut.

Taamaattumik piffinni ataasiakkaani naatitsinerup tunisassiornerullu annertusarnissaa siunertarlugu qanoq iliorluni inatsisitigut sinaakkutit pitsanngorsarneqarsinnaaneri pillugit innersuussutinik imaqartumik iliuusissatut pilersaarummik suliaqartoqassasoq siunnersuutigaara. Pisortat annerusumik minnerusumilluunniit nunalerinermut soqutigisaqarlutik aningaasaleeqataasarmata nunatta imminut pilersornerulerneratigut pitsaaqutaasinnaasut, tamatumani avataanit naatitanik naasunillu akuutissanik eqqussuinerup annikillinissaata qanoq naatsorsuuteqarfigineqarsinnaanera ilanngullugu iliuusissatut pilersaarummut ilaatinneqassasut innersuussutigerusunnarput.

Nunatsinni issittumiinnerput eqqarsaatigalugu naatitsiviusinnaasut sumiittariaqarnerinik pilersaarummi taakkartuisoqarnissaa pissusissamisuusaaq. Taakkartuinerit taamaattut nunamik naatitsinerit pitsaassusaannik qulakkeerinnittussat atuisunut iluaqutaasannaapput. Iliuusissatut pilersaarutittaaq naatinneqarsinnaasut ataasiakkaarlugit pisiniarfiit iluanaarutissaattut (danskisut avancemik taasagaat) ilimagisat nioqqutissiornerullu akilersinnaassusaa eqqarsaatigalugu naatsorsorneri ilanngunneqarsinnaappata assilissamik tamakkiinerusumik pilersitsisinnaavoq.

Peqatigisaanik iliuusissatut pilersaarutip illut naatitsiviit atorlugit silamilu naatitsineq qanoq nunatta aningaasaqarnikkut imminut napatissinnaassusaanut tapertaasinnaanera ersarissarsinnaappagu iluaqutaassaaq. Taamatuttaarlu avatangiisimut eriaginittumik økologiskiusunillu tunisassiornerup inuussutissarsiummut nukittuunngortitsisinnaanerata sunniutigisinnaasai aamma qulaajarneqarsinnaallutik.

Naatitsinerup inuussutissarsiutitut siuarsarnissaanut periarfissat iliuusissatullu siunnersuutit amerlaqarput. Ilaatigut Qorlortorsuup nukissiuteqarnikkut

iluaqutissartaa atorluarlugu Qaqortup eqqaani imeqarfigissumi illut naatitsiviit annertuumik atorlugit pilersitsisoqarsinnaavoq. Taamatut atorluaanerit tomatinik, agurkinik, peberfrugtinik assigisaannillu naatitsinerit pilersuilersinnaapput. Taamaaliornikkut sinerissamut timmisartukkut umiarsuartigullu ukioq kaajallallugu pilersuisinnaaneq anguneqarluni.

Nunatsinni pisisartut nunatsinni naatitanik piserusussuseqarput, aammattaarlu naatitsilluni nutaaliorneq ingerlanneqarpoq. Naatsitsillunili tunisassiorneq annertuumik siuarsarineqassappat iliussissatut pilersaarutip naatitsilluni inuussutissarsiornerup pilersaarusiorkakkamik inuussutissarsiutillu qajannaatsumik sanarfinissaanut innersuussutininik arlalinnik imaqartariaqarpoq.

Neriuppunga siunnersuut manna paaseqatigiiffiusumik oqallisigineqarluarumaartoq.

**Pisortanut aningaasatigut allaffissornikkullu kingunerisassat:**

Nalunaarusiorneq aamma ilisimasalinnut tusarniaanerit AC-fuldmægtigip ukiumi ataatsimi sulineranik naleqartussatut missingerneqarput, tassa 500.000 kr.-it missaannik. Aningaasanut taakkununga ilaassapput nutserineq, naqiterineq, aammalu periusissiap saqqummiunneqarnera.

**Namminersorluni inuussutissarsiuteqarnermut aningaasatigut allaffissornikkullu kingunerisassat:**

Soqanngilaq.

**Innuttaasunut aningaasatigut allaffissornikkullu kingunerisassat:**

Soqanngilaq.